

哭晁卿衡

李白

日本晁卿辭帝都
征帆一片繞蓬壺
明月不歸沉碧海
白雲愁色滿蒼梧

惠果和尚碑(節錄)

空海

從辭親就師，落飾人道，
浮囊不借他，油鉢常自持。
松竹堅其心，冰霜瑩其志，
四儀不肅而成，三業不護
而善。大師之屍羅於此盡
美矣。經寒經暑，不告其
苦；遇饑遇疾，不退其業。
四上持念，四魔請降，十
方結護，十軍面縛。能忍
能勤，我師之所不讓也。

讀史有感

寄名萬葉和歌起
遣使雲來慕漢文
晁衡登榜交詩友
空海修碑憶故人
中津弘學辭飄逸
漱石參禪句斷魂
名士從來通日漢
文章千古撥煩塵

雨後登樓

絕海中津

一天過雨洗清秋
攜友同登江上樓
欲寫仲宣千古恨
斷煙疏樹不堪愁

無題

夏目漱石

真蹤寂寞杳難尋
欲抱虛懷步古今
碧水碧山何有我
蓋天蓋地是無心
依稀暮色月離草
錯落秋聲風在林
眼耳雙忘身已失
空中獨唱白雲吟